

四庫全書

史部

欽定四庫全書

史部

平定準噶爾方略續編卷

二十九至
三十二

詳校官監察御史臣孫家賢

通政使司副使臣莫瞻菴襄勛

總校官進士臣朱鈐

校對官修撰臣戴衢亨

謄錄監生臣蔣知蘆

欽定四庫全書

平定準噶爾方略續編卷二十九

乾隆三十年三月丙子朔

飭諭參贊大臣納世通阻止明瑞及調撥觀音保兵

丁之謬

止諭軍機大臣曰納世通等奏稱辦理烏什官兵現
有一千八百餘名已足敷用伊犁事務緊要明瑞
可毋庸前來止須撥馬四五百匹接濟已由驛六

百里行文知會等語明瑞係節制各城將軍遇此等情事理應前往查辦納世通行文阻止甚屬錯謬諒明瑞未必因此撤回即一時所見未到亦必作速再往一切事宜俱遵照陸續所降諭旨辦理併傳諭納世通朕命明瑞前往不獨藉壯軍聲兼以查核起釁情節即烏什平定伊仍有應辦之事何以行文阻止顯係納世通視辦理烏什事甚易恐明瑞與伊分功懷此歧心何由集事奏內又稱

百里行文知會等語明瑞係節制各城將軍遇此等情事理應前往查辦納世通行文阻止甚屬錯謬諒明瑞未必因此撤回即一時所見未到亦必作速再往一切事宜俱遵照陸續所降諭旨辦理併傳諭納世通朕命明瑞前往不獨藉壯軍聲兼以查核起釁情節即烏什平定伊仍有應辦之事何以行文阻止顯係納世通視辦理烏什事甚易恐明瑞與伊分功懷此歧心何由集事奏內又稱

葉爾羌派來兵丁二百名甚屬平常已將觀音保
所領兵丁撥往隘口堵禦尤屬非是觀音保所領
伊犁官兵既屬可用乃不以之勦賊而置之閒地
豈又恐觀音保分伊等之功耶將來明瑞到彼如
伊等和衷協助自當一體叙功若果存此等小見
即幸而竣事亦所不取納世通著傳諭嚴行申飭
諭伊犁將軍明瑞等嚴行查辦逆回及獎賞効力伯

克等事宜

上諭軍機大臣曰昨因烏什回人叛亂曾諭嚴懲首
惡宥其脅從今卡塔海等既進功數次而納世通
至彼尚未竣事是逆回等助惡者多情節實爲可
惡觀音保現在領兵前往若烏什回人等稍知畏
懼或擒獻首惡乘間納降是其情尚屬可矜倘愍
不畏死仍行抗拒必俟我兵全至力竭始降自不
得概從寬貸著傳諭明瑞納世通等得城之後必
嚴行查辦不可稍事姑息至叛犯婦女毋庸解京

現在安插之厄魯特等鰥居者甚多應送往伊犁酌量給配其烏什城亦不可留徑行折毀以其地給回人耕種俱著明瑞等遵照辦理又

諭曰據納世通奏布魯特阿奇木領兵前來協助甚屬可嘉著明瑞傳諭獎賞其各回城伯克等似此奮勉効力者俱著分別功次具奏俟平定之日從優賞賚

壬午

以將軍明瑞領兵將至烏什

諭示進剿機宜及查辦納世通等情罪

明瑞奏言臣因烏什回人叛亂先派觀音保領兵五百名前往續因駐劄大臣被害復親領官兵一千三百餘名起程閏二月十三日至穆素爾嶺准納世通咨送奏稿知賊人尚在據守屢行突圍臣恐其以逸待勞佯為拒戰乘間逃走隨回文指示防範十四日頭起二起兵過嶺又

准咨會現兵已足敷進剿不必前來惟協濟馬
匹為要臣思烏什回城甚小似易竣事但前據
卞塔海等捉生詢問城內馬匹牛羊有四千餘
且觀音保之兵又撥防隘口其進剿兵丁半係
回人及布魯特臣不無疑慮且業經聲揚進剿
復倉卒撤兵則沿途回人等轉似伊犁有警妄
生猜懼惟有照常前往駐於阿克蘇烏什之間
若辦理以竣固善或仍須協助亦即赴援其接

濟馬匹之處現在尚可通融俱行文納世通等
俟至日面商辦理奏入

上諭軍機大臣曰昨因觀音保所領之兵納世通不
用以進勦令其遠防要隘又咨行明瑞不必前來
種種錯謬已傳諭申飭且謂明瑞未必因此撤回
今據明瑞所奏甚合朕意納世通已與賊人攻戰
數次尚未竣事倘明瑞不行前往更當何若除遵
照陸續所降諭旨辦理外看來回人以耕種為生

既防其要隘不能脫逃而農時又失自然內潰今
納世通惟知急攻與賊相持受其誘敵之計翻覺
彼逸我勞明瑞至烏什時宜知所鑒再納世通奏
稱觀音保領兵進攻因厄魯特兵先退以致受傷
等語所言未足深信即厄魯特等果有先退情節
此時且不必深求或係伊等推諉脫卸則尤失人
心併著明瑞酌量查辦又

諭曰納世通等奏與觀音保會合攻城觀音保受傷

護守礮位兵丁為賊所襲失礮一位卡塔海亦奏
稱從前伊與賊戰失礮三位俱奏請議處進剿賊
人轉致失我軍器罪固難辭然尚屬事之所有但
卡塔海一有此失即應具奏何以遲延至今待納
世通有失礮之事始行陳奏其意圖隱飾已可概
見至納世通之罪則又並不在此既據奏明俱著
明瑞於辦理烏什竣事後再行查叅請旨

甲申

諭吐魯番郡王額敏和卓暫駐烏什俟事竣再往喀
什噶爾辦事

上諭軍機大臣曰額敏和卓奏稱伊行抵游牧稍加
整頓趨赴烏什等語額敏和卓聞烏什有事即請
前往甚屬可嘉計此時明瑞應亦辦理將竣著傳
諭額敏和卓若明瑞尚須協助伊即暫駐烏什軍
前其喀什噶爾與霍罕額爾德尼部落相近亦關
緊要烏什事竣額敏和卓仍以叅贊大臣駐劄辦

事王素富侯額敏和卓往代後再回哈密

申諭伊犁將軍明瑞索取潛往霍罕求援賊人及克

取回城事宜

上諭軍機大臣曰昨據卞塔海等奏稱烏什逆回潛遣安集延回人求援於霍罕額爾德尼等語朕意以大兵前抵烏什應遣人向額爾德尼索取若此時額爾德尼早將此數人縛獻或遵檄付還俱可勿論倘索而不與即屬有心抗拒應將霍罕一併

平定另授伯克今明瑞以將軍領兵如遣人前往
則額爾德尼更知畏懼即烏什送回等望救之心
亦絕或可自潰至克取烏什之道不在攻城惟嚴
防逃走要隘擇近城水草之地牧養馬匹牲隻賊
衆饑疲無措庶不致大煩兵力併著傳諭知之
以納世通等在烏什乖張錯謬

諭將軍明瑞專任其事並察辦前此怠悞各情罪
上諭軍機大臣曰納世通等奏稱閏二月十九日領

兵進攻烏什城人數次潰敗追至城濠勦殺頗多
雖甚驚懼但恃險死守難於即克聞明瑞領兵二
三日內可至即會商進勦務期殲滅以安各城反
側之心等語近據納世通等將進勦烏什無須明
瑞前來行文阻止之處具奏朕即屢加申飭以納
世通所見非是觀其行止斷不能竣事此次所奏
愈覺不堪明係始以辦理烏什爲易慮及分功今
乃知其難又復巧爲撫飾甚屬無恥至所稱安撫

各城尤爲悖謬烏什業經叛亂尚何安撫之有若指其餘各城則現在回人俱感激朕恩捐輸口糧牲隻領兵協助又何待於安撫蓋納世通方寸已亂將効力回人俱視爲敵國尚可倚以集事乎即如攻城一事若克一城又有一城不得不急圖進取今死守者只此一城自當俟其困極自潰而納世通等株守城下兵疲力竭如此是納世通等全不曉事著傳諭明瑞此事惟伊是賴一切俱自行

決斷不可稍有推諉又據德福奏稱烏什未亂十
日前有布魯特等乘間將阿奇木伯克阿卜都拉
所牧羊隻及牧人家屬十五名口掠去等語此等
布魯特雖事發在前而相去不遠焉知非賊人等
已陰相約結乘釁搶掠明瑞到彼務將此事情節
查明辦理將起意爲匪之人正法示衆德福又稱
納世通所失礮位並非大威遠礮從前係伊悞奏
等語近因納世通卡塔海俱將失礮之處奏請議

處已交明瑞查辦並著於竣事後查明叅奏

命獎賞布魯特車里克齊等

上諭軍機大臣曰納世通奏稱噶岱默特遣往額德
格納薩爾巴噶什偵探回人愛伊特默特路遇烏
什回人等揚言布魯特俱已疑貳伊前至車里克
齊等游牧曉示車里克齊即遣伊弟海蘭達爾前
來求見又請示聽候調遣等語車里克齊素稱恭
順茲復知奮勉懇請自効甚屬可嘉著加恩賞緞

四端伊弟著賞緞二端愛伊特默特著加恩賞給
七品頂帶遇有小伯克缺出即補仍賞銀二十兩

戊子

申諭伊犁將軍明瑞索取通信霍罕回人及查核卡
塔海進剿情形

上諭軍機大臣曰納世通奏稱噶岱默特遣往額德
格訥偵探回人聞烏什逆回等散布流言即曉示
車里克齊已令伊弟前來聽候調遣雖此等造言

逆犯應向額爾德尼索取但現在進攻烏什伊若
稍有支吾又須辦理請俟事竣後再辦等語前因
烏什逆回遣安集延回人向額爾德尼求援朕即
諭伊等宜遣人索取倘支吾不行傳送則將額爾
德尼一并辦理續因伊等種種錯謬又諭明瑞當
檄行霍罕索取逆犯以壯軍聲今納世通轉以恐
生事端爲言真怯懦不堪之至著傳諭明瑞速遵
前旨索取再納世通奏卡塔海於二月十九日閏

二月初六日兩次爲賊所敗而卞塔海前奏並未
及此如納世通之言屬實卞塔海固難追諱飾之
罪若納世通與卞塔海不和意圖誣陷則其罪尤
爲重大俱著明瑞查明具奏

辛卯

諭哈喇沙爾辦事副都統明普速查庫爾勒回衆情
形

上諭軍機大臣曰明普奏稱哈喇沙爾遊擊李大勇

因庫爾勒阿奇木伯克色提克體察多倫回人情
形不甚安靜前來呈報伊與納世通相商暫回庫
爾勒查辦等語昨因明普應援烏什忽以乘時耕
種爲詞欲回哈喇沙爾曾降旨申飭今既有色提
克所報之言雖不可遽信爲實自應前往查辦並
將現在情形作速奏聞

壬辰

諭伊犁將軍明瑞酌量勦撫烏什回人事宜

上諭軍機大臣曰明瑞奏稱烏什回人雖係小醜無難勦滅但據城固守必須攻擊未免傷我官兵且城內迫脅者必多似宜設間以離其黨從前護送伊犁屯田回人之烏什伯克呢雅斯等四十餘人實不知叛逆情事俱暫交薩里看守今傳喚詢問酌將數人帶往軍前相機調遣又據從烏什脫出送信之回人阿卜都郭普爾告稱賴黑木圖拉倡亂時西城一帶回人俱不願從逆率其家屬投向

駐劄大臣而素城等疑惑不肯收留皆哭泣而去等語昨據卡塔海將數次攻城情形具奏朕即諭克城不必以進攻爲事今明瑞欲相機設間使之內潰所見尚是前因烏什回人從逆爲之死守自應大加懲創但如送信回人之言則合城並非同叛此等挈眷投向駐劄大臣之回人等若果係實情自應從寬免死但明瑞兵至烏什即來歸附始可寬貸若抗拒如初直待困極始降則又不可姑

息至阿卜都郭普爾脫出先向阿克蘇報知又詳述城中情事甚屬出力著加恩賞給六品頂帶仍賞銀五十兩

諭吐魯番郡王額敏和卓等查辦多倫回人事宜

上諭軍機大臣曰據明普奏庫爾勒阿奇木伯克色提克告稱多倫回人情形不甚安靜請回哈喇沙爾查辦等語多倫回人安插已久雖形迹稍有可疑亦未可全信額敏和卓熟悉回人情事前往烏

什時著順道至哈喇沙爾若烏什事竣伊等安靜
如常則已或稍有可疑惟在額敏和卓酌量辦理
但新有烏什一事回人等未免驚恐當使之不覺
方爲妥協併傳諭明普諸事聽額敏和卓辦理不
可自執已見

癸巳

諭哈密辦事道員薩瀚等毋庸防守摩羅和卓

上諭軍機大臣曰據侍衛保寧奏稱伊帶領入覲回

人內有伊沙噶伯克摩羅和卓係烏什人伊家口
皆在城中今聞信必自生心擬將摩羅和卓暫留
哈密看守等語摩羅和卓雖不無疑慮然伊究何
能爲即脫逃又將何往耶著仍照常帶領行走不
必留於哈密并傳諭薩瀚曉示摩羅和卓以保寧
奏伊係烏什人請留哈密奉到諭旨謂烏什之事
與伊無涉仍照常行走一面另派妥員酌量帶領
保寧辦理過當著傳旨嚴行申飭

甲午

諭伊犁將軍明瑞進剿烏什事宜

上諭軍機大臣曰據卞塔海奏稱明瑞領兵於閏二月二十七日至烏什與納世通等會議明瑞觀音保攻城之東面納世通卞塔海鄂寶攻城之西面等語明瑞已抵烏什既經定議夾攻何以具奏者僅卞塔海一人著傳諭明瑞伊知卞塔海有此奏否如知之何以不言若明瑞不知而卞塔海私自

爭先具奏不知是何意見況此議雖定究未舉行
即限行六百里馳奏尤爲可詫著明瑞據實陳奏
毋稍隱諱此次辦理軍務納世通卡塔海德福等
乖張錯謬之處皆交與明瑞查明參奏但明瑞性
情朕所深悉諸事惟委靡推讓伊若於此事不量
輕重爲周旋世故之舉斷不能逃朕洞鑒且將來
若命阿桂續查伊能當其咎乎至明瑞定議攻城
東面或因地屬緊要但東路通阿克蘇賊若逃潰

必由西走是西面亦屬要地納世通等又豈能防其逃逸且盡獲要犯耶朕甚爲伊等念之仍將進攻情形作速奏聞

命副都統伊勒圖等往阿克蘇辦事

上諭軍機大臣曰卞塔海德福等辦理烏什一事全無端緒將來竣事後伊等俱當治罪應另行派員前往伊勒圖著在阿克蘇協同綽克托辦事其雅爾屯田事務著安泰以叅贊大臣前往辦理前命

丑達往葉爾羌辦事額爾景額往喀什噶爾與納
世通交代今額敏和卓已往喀什噶爾即與額爾
景額一同駐劄栢琨著往葉爾羌同丑達辦事

丙申

伊犁將軍明瑞疏奏進剿烏什情形

明瑞奏言臣領兵於閏二月二十七日至烏什
東北之薩哈爾齊與納世通等會議納世通等
攻城之西臣與觀音保攻城之東納世通等由

烏什北山覓路前行本日次海喇巴克次日至
烏什城西之鄂托巴什三月初一日共議兩路
夾攻取城西路兵起程後臣與觀音保商議烏
什因山爲城不便攻圍祇宜斷其樵牧之路旋
據哨探兵報稱近城山口有賊觀音保負傷未
痊即領兵四百餘名前往臣一面整兵一面調
遣官兵搜查南山下村莊令侍衛恒斌等帶兵
百名爲左翼前鋒叅領委署行營翼領賽沙布

等帶兵百名爲右翼前往策應賊衆有馬步二千餘正犯西路觀音保馳往衝擊總管達克塔納等協同攻奪山隘賽沙布等斷賊末隊與察哈爾佐領和通貝克等奪取賊人礮臺七座漸近城東北角格鬪良久賊衆益多臣與木薩恒斌等奮擊賊人賊藏於城濠放鎗拒敵官兵鎗矢並發賊敗入城此次進剿殺馬步賊衆二百餘名負傷者甚衆我兵陣亡七名得傷者三十

六名奏入

上諭軍機大臣曰明瑞奏稱三月初一日東西夾攻
烏什勦殺賊衆二百餘人等語此次進攻方可謂
之奮勇勦賊且奪據山隘斷其樵牧尤爲知要觀
音保負傷効力愛隆阿在雅爾聞明瑞前往烏什
即遣恒斌協助甚屬可嘉俱賞給荷包觀音保仍
賜號卓理克圖巴圖魯賞銀一百兩効力之侍衛
官員兵丁及陣亡得傷人等俱著明瑞查明交該

部分別議敘議卹

命叅贊大臣納世通等賠補濫給口糧

上諭軍機大臣曰德福奏納世通調取官兵及布魯特回人等口糧一事殊屬瑣屑在兵丁等雖有應給之項自當酌量辦理何必按口計日致滋糜費其布魯特回人等向無給與口糧成例不過酌加賞賚豈可與官兵一體給與口糧是伊等全不知事理之輕重著傳諭明瑞此次所給布魯特回人

糧餉俱著納世通德福賠還

戊戌

命敘卹進勦烏什西面官兵及布魯特回人等

上諭軍機大臣曰納世通等奏稱三月初一日進勦烏什自辰至午衝敗賊人數次直抵西門未及關閉馬上賊衆急於入城將步下賊人踏死者甚多官兵亦勦賊百餘名二等侍衛烏爾圖及兵丁二名陣亡官兵得傷者四十五名布魯特等五名著

卷二十九
照納世通等所奏將伊所領官兵有陣亡得傷効
力出衆人等俱查明奏聞

叅贊大臣綽克托疏奏駐兵雅爾日期

綽克托奏言臣於本年正月初六日帶領滿洲
索倫兵前往雅爾訥蘇懇於初八日護送糧餉
農器及貿易紬緞前後起程日行三四十里以
紓馬力二月初六日遇哈薩克十餘人帶馬百
餘匹前來貿易臣令其到塔爾巴噶台時再行

商辦續又有阿布勒比斯所屬二十餘人帶馬
百餘匹羊二百餘隻前來亦一體曉示十五日
至尼瑪圖住宿看其水草甚好即休息馬匹駐
劄訥蘇懇亦於十七日前來五岱至烏魯木齊
安頓家口並於十九日至尼瑪圖前與將軍明
瑞約定派出索倫兵六百名在巴爾楚克山之
西合隊隨遣人哨探適與索倫哨探兵相遇即
令其回報因沿途雪深數尺定於閏二月初起

程派綠旗兵二百名除雪開路沿途所遇哈薩克等俱屬恭順十八日至額敏河馬皆浮渡又縛木爲筏以渡行李什物二十六日行抵雅爾合計行走五十餘日馬匹尚無傷損且不悞耕種之期臣選擇膏腴之地興工開墾量築城堡安設卡倫俟副都統舒泰至雅爾時再令訥蘇懇回京奏入

上諭軍機大臣曰據綽克托奏自伊犁行抵雅爾官

兵馬匹全無傷損糧餉器什亦俱運到等語此次帶領移駐官兵行走甚屬妥協綽克托五岱訥蘇懇俱著交部議敘

辛丑

申諭伊犁將軍明瑞酌量勦撫烏什事宜

上諭軍機大臣曰明瑞奏稱與納世通商議以烏什南山距城不遠約分爲兩翼前往攻取賊盤踞山嶺施放鳥鎗爲我兵衝擊敗走入城盡奪其輜重

又焚西北門外所有水磨棄其麥麵計殺賊三百
餘名得傷者甚多我宗室侍衛恒斌被烏鎗傷陣
亡厄魯特瑯海被烏鎗傷墜馬其餘得傷者十五
名似難力攻因暫息官兵等語逆回等怙惡不悛
必大加勦殺始知所警戒但烏什山險城堅進攻
不易續據明瑞奏遣回人等設間以離其黨看來
此時明瑞雖經辦理而逆回等未必即聽其言仍
以力攻致傷損官兵殊屬可憫自仍以防守要害

堵截逋逃坐待其斃爲要再納世通定議攻城西
面今明瑞兵至西北未知納世通於何處夾攻著
明瑞查明具奏至阿克蘇辦送口糧尚覺拮据烏
什城小被圍日久何未見糧餉不足而軍器火藥
亦甚有餘伊等起事時何以能預爲儲積如此著
明瑞查明具奏此次効力及陣亡得傷官兵俱著
交部分別議敘議卹又

諭曰明瑞奏稱進攻烏什時遣回人阿卜都海色木

至城下招撫有賊四人出應云我等歸順以來久
屬臣僕安敢作逆因哈密屬人擾害不堪以致犯
此重罪又抗拒大兵除畏死之外別無他意俟回
城商議等語前據卞塔海奏烏什回人因派送沙
棗樹科忽然滋事朕即諭以察看起釁情由必係
素誠平日辦理不善所致著明瑞查明具奏今看
回人等所告尚將綠旗兵欺凌伊等情事隱而未
發至阿卜都拉所屬人等任意擾害回人素誠全

未查辦現在額敏和卓前往喀什噶爾先至哈喇
沙爾查辦多倫回人事竣即赴烏什暫行協辦額
敏和卓與玉素富俱朕臣僕練事有年自不至縱
容所屬擾害回人然所屬愚人不知事體輕重希
圖小利倚勢橫行亦未可定著通行傳諭駐劄大
臣等烏什既有此等情事可爲鑒戒將來必須留
心體察約束下人斷不可失於防範以致自貽伊
戚

諭駐劄雅爾大臣等酌議哈薩克貿易事宜

上諭軍機大臣曰前議雅爾駐兵哈薩克等有小商販前來准其貿易至大商則令前赴伊犁特恐伊等因雅爾貿易近便遂不復前往伊犁但哈薩克等若以同一商販而區分大小未免妄生揣度且雅爾既駐官兵則馬匹牲畜在所必需惟減其價值以運送多費爲詞聽其情願與否即將來馬匹牲畜較多亦可陸續解送伊犁著傳諭綽克托愛

隆阿等將雅爾貿易情形會同明瑞定議具奏

壬寅

宣諭素誠等罪狀

伊犁將軍明瑞奏言臣領兵過穆素爾嶺以來
留心訪問知回人等素有怨恨駐劄大臣辦事
官員之語而怨恨烏什大臣及阿奇木伯克辦
事人者尤甚擬俟事竣據實陳奏今蒙

皇上洞鑒及此交臣查辦謹據現在所聞言之烏什

糴買官糧發給工價俱不能如數大臣公署及辦事處所用油薪俱向回人索取其不肖兵丁常將回人欺凌尚不敢與爭較至素誠父子及辦事筆帖式伊哈齊將城村回人婦女任意姦宿又見伯克之妻年少者託故傳喚入署過宿不令歸家再阿奇木伯克阿卜都拉從前尚知守分因伊妻去歲病故遂與親隨哈密回人等恣意妄爲此次辦送沙棗樹科素誠令伊子回

京一切行李俱令回衆背負並派小伯克賴黑
木圖拉押送而賴黑木圖拉之妻前經素誠留
住署內因此挾嫌倡亂煽惑所派回人彼時城
內回衆尚未盡變卡塔海領兵到彼不問事由
即行放鎗旋經射書招撫衆心未定第三日又
用礮攻城賊衆始出抗拒卡塔海被其掩擊敗
走數十里步兵百人礮三位俱沒於賊又體察
阿克蘇喀什噶爾回衆及大伯克甚畏印房行

走之人而納世通卡塔海接見領隊大臣侍衛
官員較從前進勦之將軍叅贊大臣體統尤尊
其待承辦事務之四十七烏爾袞扎木榮轉覺
過優即大伯克亦皆向伊等長跪並多派回人
服役據領隊大臣觀音保告稱伊至烏什納世
通等即送回人二百名爲官兵薪水之役伊不
敢用等語又聞喀什噶爾協辦大臣揚桑阿因
不安靜惡瘡徧體經年不愈潰爛身故再查伊

犂所交賦稅較各城爲重而烏什回人願往者衆詢據告稱伊犁賦有定額由此觀之烏什回人作亂實因擾累所致其餘各城亦恐未能妥協將來更須經理得宜仰懇

特簡親信大臣前赴回部酌定章程庶可永遠遵守
奏入

上諭軍機大臣曰明瑞將素誠在烏什平日苦累回人伊父子及辦事筆帖式等任意姦淫回人婦女

此次辦送沙棗樹科將伊子行裝多派回人背負
又小伯克賴黑木圖拉之妻曾經素誠留宿以致
挾嫌作亂卞塔海並不查訊緣由輒用礮攻城迨
回人出拒遽爾敗北再阿克蘇喀什噶爾大小伯
克見辦事人員極爲畏懼而納世通等妄自尊大
惟優待辦事各員昨觀音保領兵赴援即撥回人
二百名以供樵汲等語納世通卞塔海素誠俱受
朕深恩身爲大臣各駐專城辦事乃素誠父子在

烏什任意將回人科派苦累且姦其婦女納世通
卡塔海平日妄自尊大一聽所屬官兵將回人凌
虐至辦理烏什一事卡塔海既冒昧進攻又復倉
卒敗北并將此等情節希圖隱匿不即據實奏聞
而納世通領兵甫至彼處始則恐明瑞爭功行文
阻止繼復懇求援助無恥實甚彼時明瑞若聽其
阻止竟行撤回尚不知釀成何等事端且正當撫
輯未生事之回衆令其傾心出力之時反撥給觀

音保回兵二百名以備使令是又具何肺腑即此撥兵一節其平日之任意苦累更不問可知納世通卞塔海種種背謬乖張不可枚舉是烏什之始而激變繼而聽賊猖獗不能尅日平定者皆伊等卑鄙無恥庸妄僨事所致實堪髮指此內素誠情罪尤屬可惡雖經自戕不足蔽辜著交留京辦事王大臣將素誠家產查抄其現有之子著俱革退差使發往伊犁充步甲當差納世通卞塔海之罪

雖不至將伊子一併從坐而伊等本身斷難寬恕
所有治罪之處另降諭旨其二人家產亦俱著查
抄明瑞奏併發

諭伊犁將軍明瑞等辦理烏什及接辦善後事宜

上諭軍機大臣曰據明瑞查奏素誠納世通卞塔海
等情事朕已節次鑒悉故一切專委明瑞辦理又
命阿桂前往協辦阿桂至烏什即同明瑞傳旨將
納世通卞塔海於軍前正法看來烏什回人雖罪

在不赦亦大臣等擾累所致自宜分別辦理著傳諭明瑞此時如尚未克城即將查奏情事宣諭招撫若抗拒如前仍盡行剿殺至善後事宜已派永貴前往喀什噶爾將來陸續辦理阿桂著速赴烏什一切事宜與明瑞會議具奏明瑞先回伊犁阿桂留烏什數月俟事定後與永貴交代再往伊犁接辦明瑞所管事務明瑞於來年回京亦可俱著傳諭知之

下之學堂に於て

2157

平定準噶爾方略續編卷二十九

欽定四庫全書

平定準噶爾方略續編卷三十

乾隆三十年夏四月丁未

叅贊大臣愛隆阿疏奏巡查邊界情形

愛隆阿奏言臣於正月初一日領兵自伊犁起程過阿勒坦額默勒驅逐越界游牧之哈薩克等查自哈喇哲克德至勒卜什畢什罕招摩多俱間有偷越游牧者臣派出侍衛官兵嚴行驅

欽定四庫全書

平定準噶爾方略續編
卷三十

逐哈薩克等俱驚懼遷移臣領兵尾隨出境閏
二月二十六日行至雅爾綽克托五岱訥蘇懇
亦俱相會將前次標識之屯田築城處所逐一
指給又派卡倫兵九十名於二十七日起程照
原奏安設臣於三月初十日回至伊犁奏入報
聞

辛亥

諭伊犁將軍明瑞等辦理庫爾勒回人事宜

上諭軍機大臣曰明普奏稱玉古爾庫爾勒回人俱
照常耕種並無可疑惟阿奇木伯克色提克據回
人等首告哈子伯克阿瑞噶雜納齊伯克和碩爾
等散布流言意圖叛逆傳訊回人與原告相符已
將阿瑞等及應行質訊之人拏獲看守等語昨據
明普奏請回抵哈喇沙爾查訊回人朕卽諭以宜
加慎密若毫無形迹則已設果潛懷反側辦理時
當出其不意倘令稍有知覺則各城回人因此驚

懼或至另生一事亦未可定著傳諭明瑞朕以額敏和卓熟習回部情事伊至哈喇沙爾時當令其留心體察若回人等實係謀叛何以並未舉事坐待拏問如謂本無其事則回人等首告之言又何以衆證符合將來查明時若祇阿瑞等數人起意造言即將伊等正法示懲不必輾轉株連諒額敏和卓必能妥協辦理再審訊既實則色提克尙屬輸誠効力自應加恩獎賞著明瑞等以朕旨宣示

照伊現在職銜加一級賞戴孔雀翎仍賞緞八疋
壬子

諭伊犁將軍明瑞等辦理勦賊及更換辦事領隊大
臣

上諭軍機大臣曰明瑞奏自三月初九十三十四十
五等日進攻烏什情形又據伯克薩里請遣親信
回人呼特呼默特持書前往招撫回衆等語逆賊
等倚恃城堅糧足敢行抗拒朕已節次傳諭不必

徒事攻擊惟嚴防要隘俟其自敝此時若尚未竣
事則鄂津所領伊犁官兵五百名亦到倍添威力
至納世通等攻守一隅屢戰挫衄久留該處必至
債事昨已降旨將納世通卡塔海於軍前正法明
瑞此時且不必宣露俟阿桂到彼一同傳旨辦理
納世通等俱擾累回人爲衆所惡若不早正典刑
則回衆不知天朝法紀著一面傳諭阿桂速行前
赴烏什將納世通卡塔海正法後其所領官兵即

著阿桂管轄與明瑞協力取城至領隊進勦愛隆
阿尙屬諳練著明瑞酌量如伊犁不必定須愛隆
阿駐劄即派赴烏什辦事至德福與卡塔海同在
阿克蘇辦事俱無端緒德福雖罪不至於正法或
將伊革職令其効力行走或作何治罪之處亦應
定擬所有應辦錢糧緊要事件暫調伍爾泰赴阿
克蘇辦理俱著明瑞妥議具奏納世通等奏摺俱
未批示一併發交明瑞閱看酌量查辦奏聞

諭喀什噶爾辦事副都統栢琨查奏納世通罪狀

上諭軍機大臣曰納世通進勦烏什全無端緒且任意虐使回人看來伊在喀什噶爾時亦必妄自尊大或有無恥情事俱未可定著傳諭栢琨伊至喀什噶爾多時已奏事數次納世通在彼行止豈全無見聞何以未經奏及奉到此旨務須徹底查訪據實參奏亦傳諭明瑞阿桂如栢琨有徇庇納世通稍爲隱匿之處一經查出即行參奏治罪

諭伊犁將軍明瑞辦理回部事宜

上諭軍機大臣曰明瑞奏哨探人等擒獲一賊交木薩訊供據稱城內回衆議論不一有謂投降必不全戮者有謂烏什城池堅固厄魯特曾以三萬兵圍守九月竟不能克今喀什噶爾阿克蘇人心俱變不過麥熟前亦亂其言雖不可全信似宜留心防範且駐劄大臣等辦理不善回人不能相安似宜專於伊犁駐劄大兵以資彈壓其回部各城仍

其舊俗不必駐劄大臣官兵等語所奏未合事機
自平定回部以來駐兵辦事已成定制一旦忽爾
改易殊非國體且烏什情事皆由大臣等激變既
經嚴治其罪則後來定知所懲戒設仍有愍不畏
法者亦有誅無赦而已若因烏什一事將各城大
臣官兵裁撤非徒示弱於回人即如補授阿奇木
伯克誰爲揀選保舉而阿奇木等或妄自尊大不
奉伊犁約束又將如何辦理耶至厄魯特三萬兵

攻圍不克之語益屬荒誕從前霍集占據有全部
何以各城俱皆攻克迎降此不過助惡之伯克等
作此語以固其屬人之心耳著傳諭明瑞當持以
鎮定一意堵截要隘防賊脫逃彼芻糧既盡自然
內潰一切事宜俱同阿桂永貴酌議具奏若各城
駐兵尚少將來酌量增加亦可併傳諭阿桂知之

乙卯

喀什噶爾辦事副都統栢琨疏奏布魯特等送

烏什回人供吐情形

栢琨奏言本年三月十四日據布魯特車里克
齊遣伊弟喀喇們都前來告稱烏什逆回賴黑
木圖拉等差往霍罕求援之巴卜敦瑪瑪達布
拉爲我等擒獲解送軍營臣等嚴加究訊據巴
卜敦供烏什阿奇木伯克阿卜都拉近年全不
愛惜我等將疲瘦馬匹羊隻散與衆人希圖重
價素大人並未查問且將烏什回人等妻女子

婦喚去調戲所屬官兵亦將我等婦女任意姦
宿以致激成事端二月初已有流言十四日適
會解送沙棗樹科派人稍多賴黑木圖拉與阿
哈拉克齊海色木和卓商同叛逆海色木和卓
向阿卜都拉出首轉告素大人隨領兵至阿卜
都拉所居將大伯克等擒拏以致城內煽動賴
黑木圖拉等五人即揚言阿睦爾撒納兩和卓
木俱領兵前來遂倡衆堵截街巷戕害官兵素

大人父子自盡阿卜都拉被擒隨將鄉村回人
盡驅入城以銀兩緞疋遣我等前往霍罕布魯
特求援并揚言各城俱叛續有喀什噶爾阿奇
木伯克等遣人曉示惟烏什一城變亂餘皆安
堵布魯特知我等犯罪實情將銀兩什物俱行
搶掠仍行看守又有安集延貿易三人不知去
向今喀什噶爾差人到彼即將我等解來其現
在有無商議之處實不知情奏入

上諭軍機大臣曰栢琨將布魯特車里克齊解到送
信回人逐一訊供看守已酌賞車里克齊等緞疋
等語此等回人俱賴黑木圖拉親信據供烏什有
馬五六百匹口糧將盡較之明瑞捉生詢問所供
不符益見前言之未可深信惟絕其糧道防禦逃
逸自然內潰但駐守官兵接濟糧餉甚屬緊要明
瑞當豫爲籌畫再車里克齊等拏解回人先將其
銀兩緞疋搶奪亦不可不明白宣諭著明瑞曉示

車里克齊云爾等拏解潛通信息回人甚屬可嘉
伊等所攜雖係官物即以充賞嗣後凡有此等脫
逃通信之人俱照例辦理仍加賞車里克齊緞四
疋至栢琨奏巴卜敦瑪瑪達布拉係賊人心腹若
縛置軍前俾賊人看視以絕其望救之念於事有
益所見尚是明瑞即照此辦理又

諭曰前據明瑞查奏烏什回人一事實由素誠等狂
縱妄行以致激成事變及納世通之妄自尊大凌

辱回衆卞塔海之輕率攻城掩飾敗狀均爲法所
難宥已將伊等分別治罪示懲茲復據栢琨奏訊
取巴卜敦等供詞則素誠在烏什姦淫婦女苦累
回人各款俱與明瑞前奏相同是其情真罪當實
屬衆口如一著諭衆知之

丁巳

申諭伊犁將軍明瑞加意堵截賊人毋庸再行招撫
上諭軍機大臣曰前據明瑞以圍城無益當遣回人

招撫具奏迄今多日未見奏及看來烏什回人死
守不降顯然可見若仍設間招撫恐賊人謂攻城
無策惟以納降爲事著傳諭明瑞毋庸再行招撫
現在大臣官兵多係坐糜糧餉此時固不必急於
進剿而防守堵禦尤當加意如一年不克即駐守
一年俟其自潰可耳

乙丑

諭伊犁將軍明瑞添調兵丁事宜

上諭軍機大臣曰據阿桂奏現在明瑞所領之兵尚有盈餘但圍城總覺不足因詳細會議添調兵丁二千名等語明瑞在彼一切事宜皆當辦理今阿桂既經知會自當盡心選練勿致遲延貽誤著會同商辦俱奏

戊辰

諭將軍總統要務參贊大臣毋得專擅

上諭軍機大臣曰據栢琨奏准納世通咨與明瑞會

商令將回人已卜敦瑪瑪達布拉送赴烏什等語
昨因栢琨請將拏獲潛通信息之回人等縛置軍
前俾賊人見之絕其望救之念朕即以此事尚屬
可行屢降諭旨而明瑞等總未具奏此次栢琨所
奏則係納世通咨取又云與明瑞會商甚不合理
明瑞係總統回部將軍納世通不過參贊大臣各
城一應事宜當聽將軍查辦豈有參贊大臣專主
一事僅知會將軍同辦之理且將軍明瑞等數日

以來並未將烏什事體如何之處奏聞甚屬不知
緩急俱著傳諭知之

辛未

申諭新疆大臣等和衷集事

上諭軍機大臣曰據明瑞奏稱烏什逆回等以死固
守而納世通卡塔海等未能和衷辦事每多掣肘
等語納世通卡塔海等不能和衷集事朕早已知
之但伊等之罪尚不在此惟諱敗飾功存心欺隱

其罪甚大是以降旨將伊等正法大臣等辦理國
事原不應分別彼我至朕用人行政一本大公大
臣等如果同心協力自當並錄其功若乖張僨事
亦必均任其咎從不稍有偏徇即富德等入拔達
克山索取霍集占兄弟之時兆惠並未前往朕因
其事已集未行深究若稍有貽誤自必治兆惠之
罪納世通卞塔海因不相合以致僨事今阿桂永
貴陸續前往萬不可仍蹈覆轍俱著傳諭知之

壬申

諭內大臣尚書阿桂等軍前奏事及交代印務各事

宜

上諭軍機大臣曰阿桂奏稱從前辦理軍務時叅贊
領隊大臣俱不另行奏事今烏什事體雖小業經
將軍前往應照向例或同將軍列名或俱呈轉奏
庶事權歸一亦可省臺站之勞等語辦理烏什非
從前平定準夷回部可比且進攻烏什時明瑞在

東納世通在西各有分地一切情形若待呈明將軍然後具奏必致耽延時日現在各處駐劄大臣有事豈能一一呈明將軍代爲具奏耶納世通等罪在有心欺隱諱敗爲功若另行奏事尚無妨礙阿桂至烏什領納世通之兵仍將西城攻守情形酌量即行奏聞有會商之事即合詞具奏伊等和衷與否並不在此再阿桂奏請辦理軍務暫用何處印信阿桂抵烏什時永貴尚不能至著暫用喀

什噶爾大臣印信計永貴至彼烏什應已藏事明
瑞離伊犁日久人情未免揣測著即先回阿桂多
留數日再與永貴交代前往伊犁並傳諭明瑞知
之

五月丁丑

吐魯番郡王額敏和卓等疏奏審擬逆回阿瑞
等罪狀

額敏和卓等奏言臣等將逆回阿瑞及原首回

人克伊雅斯等提集審訊據原首人供閏二月初五日薄暮哈子伯克阿瑞遣人邀請飲食有伊兄噶雜納齊伯克和碩爾及弟姪等十一人在坐阿瑞忽云聞烏什各城俱叛我等何不將阿奇木等殺死掠其所有分與衆人以克伊雅斯爲導至烏什日我爲大伯克爾等俱得大頭目等語衆俱無言和碩爾云我曾經入

覲親覲

大皇帝威福且賞賚甚重爾如何出此妄言再不改
悔必呈報取爾首級即率其子三人先行我等
三人隨出告知阿奇木伯克等語據阿瑞供因
阿奇木伯克色提克與我不和心甚懷恨是以
欲將伊殺掠其各城俱叛係屬造言臣等窮詰
情由據供去年色提克無故將我毆打一次詢
之色提克亦稱去年派差阿瑞以老弱充數抗
拒不換因以鞭打伊數下是實臣等謹按阿瑞

以多倫微末回人蒙

恩授爲哈子伯克乃敢挾嫌乘隙謀爲叛逆罪不可
追應請將阿瑞按律凌遲處死仍梟首示衆妻
子緣坐和碩爾雖經斥責並未首告且係親兄
亦應擬斬立決其弟姪等俱應緣坐但情事稍
有不同謹分別定擬色提克因公將阿瑞鞭責
應毋庸議奏入

上諭軍機大臣曰額敏和卓等審訊多倫逆回阿瑞

聞知烏什信息倡言惑衆一事阿瑞著即凌遲處
死將伊妻子解京賞給王大臣爲奴伊兄弟和碩
爾等雖不能首告但業經斥責並未聽從且係新
附回人不知內地法律俱著加恩省釋餘如議

壬午

叅贊大臣綽克托疏奏雅爾屯田駐兵情形

綽克托奏言臣於閏二月二十六日至塔爾巴
噶台會同叅贊大臣愛隆阿以將軍明瑞所定

築城屯田事宜逐一指出查現領綠旗兵六百
名即派五百四十名掘渠引水開墾荒地其備
差兵六十名以十名入山採取碾磨之石餘令
隨同滿洲索倫兵斫取柳條於營外周圍挿護
營內各分院落苫蓋窩鋪暫收糧餉緞疋等物
設立堆撥看守計自駐劄月餘以來時雨數降
地畝俱已開墾次第播種青稞麥粟正有暇日
以臣愚見若趁此時伐木刈葦合土築城則年

內似可竣事三月二十六日令叅將吳士勝原
任主事伏魔保領綠旗聽差兵丁興工仍於屯
田兵丁內勻出協助照明瑞所定玉爾雅爾兩
處築城即將所帶車輛輓運計所築城垣周圍
二里四分高一丈五尺足敷兵丁一千五百名
駐劄所建官署倉庫共六百餘間仍有餘地以
備添建謹繪圖貼說恭呈

御覽奏入報

聞

丁亥

伊犁將軍明瑞等疏奏豫防逃賊情形

明瑞等奏言臣等自三月十五日勦賊後恭承
訓諭暫緩攻圍但賊人亦時出牧放牲畜竊掘糧石
隨派員擒勦捉生詢問據供賴黑木圖拉誑衆
云大兵久未攻城乃待我自斃之意我既不忍
棄爾等而逃若歸降又必被殺四月初十日爲

派噶木巴爾成道之期當與東路官兵決戰雖
死亦得好處等語臣等看賊人情形漸覺迫切
密飭嚴防十一日午時忽有馬兵五百前行隨
以步賊千餘直犯我左翼臣等即領兵力戰於
賊多處倍加攻擊賊仍不退因點放大神礮礮
子落於賊隊者兩次始敗走入城十三日未時
城東門先有步賊埋伏續有馬賊百餘衝我左
翼城西北門又有馬賊三百餘衝我右翼合戰

良久賊不能支逃入山口桑林內隨以礮攻賊
皆遁出我兵襲擊至西北門聞城內有婦子哭
聲此日西路官兵聞臣等交戰聲息亦派兵攻
擊臣等看得賊雖以死拒戰其氣甚衰誠恐有
潛逃之舉現在分兵堵截并行文納世通等一
體防範奏入

上諭軍機大臣曰明瑞等奏聞賊有決戰之信即整
兵進剿連戰敗賊恐其事急潛逃於要隘分兵防

守等語以賊人現在情形計之賴黑木圖拉若不爲其屬人所殺必至潛逃此時脅從之賊若擒獻首惡尚可寬貸否則仍遵前旨辦理

命革和闐總兵和誠職拏問治罪

上諭軍機大臣曰據額爾景額叅奏和闐總兵和誠於上年十二月派阿奇木伯克阿什默特署筆帖式松科泰家人李文等假巡查六城爲由松科泰李文索取回人金錢衣物衆回人無不嗟怨等語

和誠以辦事大員任聽屬官家人求索所部甚屬不堪且安保無指使情事和誠著革職拏問奏內
有名人犯俱交明瑞阿桂嚴審定擬具奏至阿什
默特雖有干涉若衆回人不行首告即毋庸深究
昨據額爾景額叅奏和誠私采哈朗圭塔克之玉
隱匿不進朕以采玉尚無關緊要姑從寬貸此次
所奏情事又在采玉以前則是和誠向日行止不
端額爾景額未免爲之姑容今見素誠在烏什以

貪婪債事始補行參奏殊屬闖茸著傳旨申飭昨
伍諾璽以布政使銜赴和闐辦事此時著富明安
暫署丑達亦著往和闐辦事

諭駐劄各回城辦事大臣等毋得互相瞻徇

上諭軍機大臣曰駐劄各回城辦事大臣理宜潔已
奉公約束下人撫輯回衆毋令絲毫擾累乃大臣
等遇事往往彼此岐視漠不相關以博長厚之名
雖有見聞概行容隱若果能以國事爲重於同官

有不法之舉即行叅奏則不肖之徒知所顧忌何
至滋生事端即如烏什一事可爲炯戒現在和誠
又縱伊屬員家人求索所部額爾景額平日豈無
見聞而僅以私采玉石一事入奏朕以爲無關緊
要姑從寬貸及烏什事發始補行叅奏若早如此
直切指陳則和誠早經治罪矣額爾景額即係姑
息瞻徇著傳諭各該大臣等嗣後有仍蹈覆轍擾
累回人者鄰城一有見聞即據實叅奏其或以私

事不合互相傾軋亦不能逃朕洞鑒

命酌量寬宥霍集斯舊屬人等

上諭軍機大臣曰前諭明瑞等以霍集斯之姪及其族人俱在烏什尚可酌量寬免除臨陣斬殺外其餘獲餘人著查出奏聞今據霍集斯將伊親屬之在烏什者開列具奏著即錄寄明瑞等實係脅從者應查出請旨若有意助逆雖霍集斯親屬亦不可免即行正法又前旨烏什逆賊妻女俱送往伊

犂給厄魯特爲妻至霍集斯舊屬不必同衆辦理
仍查出奏聞

庚寅

命副都統伊勒圖往雅爾辦事更換副都統納蘇懇
往阿克蘇同叅贊大臣綽克托辦事

癸巳

命獎賞擊敗賊人收取牲隻官兵

上諭軍機大臣曰明瑞等奏稱四月十八日賊人驅

出牲隻甚多一半渡河牧放因伏兵五十名候賊人舍騎刈草之時突起衝擊擒三人殺二十人其渡河之賊被殲大半收取牛馬驢三百餘分賞効力官兵等語此次官兵擊賊收其牲隻甚屬奮勉著查明有應賞巴圖魯號者奏請賞給仍酌量獎賞以示鼓勵今日據納世通等雖奏稱與賊交戰數次並未有實在勞績著傳諭明瑞凡城西堵截賊人樵牧俱著一體加意辦理

乙未

命解送回人巴卜敦等於軍前不必候獲犯質對

上諭軍機大臣曰近據栢琨奏布魯特車里克齊擒
送之回人巴卜敦瑪瑪達布拉若令烏什回人觀
看可使伊等內亂與明瑞會商已解往軍前等語
明瑞此時應將伊等使賊人觀看或遣回城內即
謂逆黨不便輕縱亦當使所擒生口知之酌量發
回數人以亂逆賊之心乃昨據明瑞等奏因供詞

不符須布魯特貿易之三人前來質對已行文車
里克齊等語巴卜敦等通信情節毫無可疑何必
候此三人質對著將現在辦理情形若何作速具
奏

己亥

申諭伊犁將軍明瑞辦理逆回毋事姑息

上諭軍機大臣曰明瑞奏四月二十七日桑林內有
馬賊二百餘名領步賊二千餘名斫取桑樹臣急

速領兵進攻計捉生七名勦殺二百餘名得馬及
鳥鎗無算又將拏獲小回人二名放回以離間城
內人心等語明瑞此等意見甚不曉事豈欲圖賊
人感激耶殊不知我兵初到時累示懲創賊即納
降尚可酌量寬宥今已抗拒數次並未悔罪歸附
者非闔城誅戮無以示儆將來著傳諭明瑞仍遵
前降諭旨不可稍事姑息

壬寅

命免哈密郡王品級貝勒玉素富議處

上諭軍機大臣曰玉素富奏稱伊弟阿卜都拉騷擾
烏什回人以致債事俱由伊素失教訓請交部嚴
加議處等語阿卜都拉以阿奇木伯克縱所屬人
等滋擾激變罪由自取與玉素富無涉著加恩免
其交部

癸卯

諭現審庫爾勒回人情節俟烏什事竣會辦

上諭軍機大臣曰據明瑞奏額敏和卓會同明普審訊回人阿瑞一案額敏和卓欲將阿瑞之兄弟和碩爾等聲請寬免而明普執意不從及額敏和卓告知明普代具奏摺而明普又未將額敏和卓原議敘入是以額敏和卓與臣咨商行文明普暫緩辦理俟烏什事竣再行審訊等語額敏和卓係特派會同明普審訊阿瑞等罪案若額敏和卓有札商情節明普自當據實陳奏乃偏執已見殊不可

解現在烏什事務緊要阿瑞一案業經停其辦理
著俟事竣後明瑞會同阿桂再行明白查審具奏
申諭伊犁將軍明瑞等加意堵剿賊人事宜

上諭軍機大臣曰據明瑞節次奏報進攻烏什情形
朕以逆賊等一心死守即困憊出降亦不可寬宥
今又據所奏捉生詢問之言是賊人口糧將盡不
久即可取其城縱使歸降亦不過圖免誅戮非其
本心益不可信著傳諭明瑞但遵陸續諭旨加意

堵截搜勦拆毀城堡以杜後患萬勿稍存姑息之
見

伊犁將軍明瑞等疏奏拏問納世通等情形

明瑞等奏言伏思烏什軍務甚要納世通卞塔
海平日辦事糊塗此次舉動尤爲錯謬荷蒙

睿鑒將納世通卞塔海嚴拏正法即令觀音保明亮
前往接辦但納世通等分兵西北若解至臣營
相距數十里伊等聞屢次斥責之信必甚驚懼

恐其知所犯罪重或致自戕未能明正國法臣等即派領隊大臣觀音保明亮前往將納世通卞塔海交與侍衛訥蘇等護送前來稟稱拏納世通卞塔海時齊集侍衛官員伯克宣讀

諭旨回人布魯特俱歡喜告語至愛隆阿伍彌泰因伊犁事繁不便遠離德福向在阿克蘇雖辦事糊塗近頗知省改可否暫行寬宥俟綽克托伊勒圖等到時再將伊犁職治罪奏入報

聞

甲辰

宣諭納世通罪狀

喀什噶爾辦事副都統栢琨奏言臣欽奉

諭旨訪查納世通在喀什噶爾辦事時如何妄自尊

大苦累回人并有無卑污無恥之事臣於接見

噶岱默特等伯克官員之便留心訪查知納世

通常出行圍每次約需馬步回人二三百名以

此或失生業及催覓馬匹科派等項殊爲苦累
再納世通每妄自尊大一切委任屬員不常接
見回部伯克惟主事烏爾袞因畧曉回語小有
才情納世通甚加寵信諸事交辦不加約束烏
爾袞因此放縱向所屬回人勒索什物任意凌
辱又詢之護軍叅領保成云烏爾袞曾管布魯
特回人隊伍竟將布魯特散秩大臣阿奇木毆
辱阿奇木深爲怨恨其毆辱之由大約因索物

不遂等語至納世通有無卑污無恥之事臣細
加訪問衆人咸謂並無其事即納世通或有此
心但伊不通回語且與回人隔城居住斷不能
掩衆人耳目詢之副都統常岳所言亦同伏思
納世通辜負

天恩自干重咎早經

聖明洞鑒交明瑞等辦理至烏爾袞恃勢凌辱回人
索取財物甚至毆辱散秩大臣阿奇木情殊可

惡若不拏問審明重治其罪不足以昭炯戒而服人心伊現在烏什軍營臣謹密咨將軍明瑞就近辦理奏入

上諭大學士曰前因烏什之事朕以回人斷無無故作亂之理必係彼處大臣官兵等將伊等苦累不堪致啓釁端因交明瑞查奏嗣據明瑞等將納世通平素妄自尊大於辦事人員過為寵信等款陸續奏聞今栢琨又將納世通在喀什噶爾從前帶

領回人行圍并主事烏爾袞任意勒索回人毆詈
伯克種種劣蹟查奏各城駐劄辦事大臣俱身受
朕恩爲一城統領大員自應潔已率屬安撫回衆
即偶爾行圍藉以操練官兵原屬可行但祇應帶
內地兵丁至於回人俱以耕種爲生乃常派其出
圍以致伊等廢時失業有是理乎曾見內地大臣
有帶領農民行圍者乎實屬悖謬不堪再回部伯
克俱係恩賞職銜品級之人該管大臣固不可過

於優容亦不可任意凌賤至官員等尤非大臣可比烏爾袞不過一主事耳竟敢將散秩大臣阿奇木毆辱實出情理之外此皆大臣等平日過於寵信所致若不重治其罪何以示懲是以降旨交明瑞阿桂等將納世通卞塔海治罪外併將烏爾袞等審明定罪著傳諭各城辦事大臣嗣後各宜守身潔已善視伯克一切事務秉公辦理屬下人員嚴加約束毋令擾累回衆以納世通爲炯戒著通

行曉諭知之

平定準噶爾方略續編卷三十